

T 3190/3328.83

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
MAY 29 1941

5

永順縣志

卷之四

風土志

湖南永順府



知縣

黃德基重編

哈佛大學漢和圖書館珍藏印



五方之風土不齊民生其間者異俗自昔已然亦天下皆然何獨於永順而異之第永順舊隸土司未沐文治往往因陋就簡所謂居鄉而囿於鄉者也近奉設流官修政立教風景以闢氣象一新若人若物駸駸乎同於內地茲將氣候習俗語言撮舉於後使其同而異亦異而同云志風土

廣元王伯麟識

氣候

春深天寒夏中日燥秋初炎蒸冬末溫煖端陽衣單葛重陽加薄絮雪深尺則沍凍冬驟雨則雷鳴日出常熱天陰常冷

習俗

永邑民俗短裙椎髻常喜漁獵銅鼓祀神刻木為契土司舊志曰重崗複嶺陡壁懸崖接壤諸崗又連漢地苗土雜居男女垂髻短衣跣足以布勒額

喜斑斕色服重耕農男女合作喜漁獵食羶信鬼巫病則無醫惟椎牛羊師巫擊鼓鈴卜竹筭以祀鬼死則環屍哭泣且歌終日即葬無喪服語言侏儻不識文字凡有誓約以刀畫竹數道為券婚娶以牛布五穀為聘婦女喜垂耳圈兩耳之輪各贅至十飾項圈手圈足圈以示富散處谿谷所居必擇高峻履險陟嶺捷足如飛運載食物以背駝之約繩於膊偃僂而行恒帶刀弩長鎗性強悍猜疑輕生好鬪狠仇殺

李氏曰

李諱瑾為前任永順知縣後凡言李氏同

永順隸楚極邊土人

漢人苗民雜處土人十分之四漢人三分苗民亦僅三分漢人居此俗與內地同苗性悍野貪而多疑畜髮垂髻兩耳帶圈出入佩刀携鎗祀青草鬼刻竹為契少不合即行刼殺血誓為信此苗俗也土民柔懦樸拙淳直懼官怕訟每歲三月殺白羊擊鼓吹笙以祀鬼四月十八七月十五夜祀祖九月九日合寨宰牲祀重陽以報土功十二月二十八日夜祀祖名曰祭鬼禁聞猫犬聲稼穡而外

事商賈他若疾病不事醫藥歌喪哭嫁宗巫尚鬼同姓為婚嫁娶背負男女溷雜乃其俗之陋者然可取者男耕女織不事奢華頗有古風云

又曰按舊土司家乘永邑山多田少刀耕火種食以小米糲子為主稻穀多仰給永定衛大庸所兩處土人淳直畏法無苗人悍惡之風亦無漢人狡詐之習各處所種以小米糲子為主不甚種稻穀即種亦不知耕耨今教之耕耘輒欣然聽信子弟姿質亦秀教之讀書其聰穎不遜漢人又知畏敬

官長余每以勸課至田間咸羅拜於馬下送茶及酒盤乘熟雞子跪而獻之稍為飲食乃喜或有事傳呼及期而至其醇良易治非內地所能及也麟按永順地方先屬土司世業今值改土歸流以生以食各遂所天其俗淳龐渾噩邇來讀書應試服疇力穡熙熙穰穰雞犬桑麻宛然中土厥性耐寒雖隆冬止衣單布惟婚禮必以牛隻銀布各物為聘孀婦再醮不候服除同姓為婚兄納弟妻弟收兄嫂女字於人外家索取骨種銀物每家設火

床中置火爐用以炊爨日則男女環坐其上夜則雜卧其間僅令夫婦共被以示區別種種陋習驟難革除麟職任民牧轉移風俗是其專責屢經示禁又復隨時化導亦漸漸更改惟冀後之蒞茲土者共相維持俾去其舊染與內地之民同風一道云又永順各鄉惟功全冲正西英田家羅衣等保係苗人餘俱土人各保沿邊一帶苗人雜處乃土司招徠安插使之捍禦以備藩籬者俱畏法敬官安靜淳良非連界之鎮算永綏各處紅苗桀驁難

馴者所可同日語也

又按永俗酬神必延辰郡師巫唱演儺戲設儺王男女二神像於上師巫諷咒禮神討筭以卜吉凶至晚演儺戲敲鑼擊鼓人各紙面有女裝者曰孟姜女男扮者曰范七郎沒於王事妻姜女哭之其聲悽慘鄉民聽之至有垂泪者相習為常不知所自又土俗各寨有擺手堂每歲正月初三至初五六之夜鳴鑼擊鼓男女聚集搖擺發喊名曰擺手蓋被除不祥也六月中早穀初熟炊新米宰牲

名曰祭鬼亦民間薦新之意

附錄禁陋習四條 乾隆七年 知縣 王伯麟

一禁勒取骨種 永順土人陋習凡姊妹出嫁於人所生外甥女長成其母舅人等必索取骨種或銀錢布疋或牲畜米穀以贖其愆然後許嫁如或力不能備必準算一女與母舅之子為婚且不論男女年貌是否相當以致多有男小女大男大女小不相匹配者陋習相沿有乖風化業經本縣示禁在案合再刊示諭禁嗣後除姑舅兩姨姊妹兩

家願為婚姻者仍照例聽其自便外如敢仍踵前
轍勒索骨種及準算甥女不論年貌混配已子者
着該地保甲牌鄰同女父母據實稟報以憑嚴拿
重懲倘敢知情徇隱察出併究不貸
一禁違律轉房 律載兄亡收嫂弟亡收弟婦者
俱應絞罪有娶同族兄弟伯叔子姪之妻妾為妻
妾者俱論服制之遠近以定罪名之輕重由杖徒
以至絞斬律法何等嚴切乃永順土民向來陋俗
每有兄納弟妻弟配兄嫂及婚娶同族兄弟伯叔

妻之事名曰轉房總因舊隸土司不聞禮教所致
今幸歸流日久此等陋俗自應滌除合行刊示嚴
禁嗣後凡屬同族兄弟伯叔子姪妻妾有本夫亡
故者聽其守節或聽改嫁其本族之人無論親疎
有無服制俱不得娶為妻妾如敢仍踵轉房陋俗
着該地保正甲長牌鄰人等赴縣首報以憑嚴拿
按律治罪倘敢扶同隱匿察併究不貸
一禁違例爭贖遠年田產 永順未改土之前土
司差役繁重田土甚賤有輕價出售者亦有將田

土立契給人止翼承頂差徭不索其價者今值改
土歸流輕徭薄賦以致田土價值日貴奸猾之徒
妄思收回故業不云是當非賣即云原係交付代
管希圖找贖爭佔不遂即行捏情控告庭訊之下
概屬子虛查定例已賣之產契無回贖字樣者不
許找贖違者治罪通行在案嗣後除契載回贖字
樣定有年限確有實據者聽其備價取贖如力不
能贖許照例憑中公估找貼另立賣契或儘問當
主不願找貼聽其別賣歸還原價外其已經售賣

契無回贖字樣及失業多年之產毫無憑據者一
概不許勒贖索找混行爭佔藉端捏控如違定行
嚴拿照例治罪決不寬貸

一禁男女混雜坐卧火床 永順土民之家不設
棹橈亦無床榻每家惟設有火床一架安爐竈於
火床之中以為炊爨之所闔宅男女無論長幼尊
卑日則環坐其上夜則雜卧其間惟各夫婦共被
以示區別即有外客留宿亦令同卧火床寡廉鮮
恥莫此為甚現今歸流漸久爾等土民讀書應試

俱與內地無異豈可仍循陋習本縣久經示令改
拆茲因查點烟戶見爾等土家尚未盡改合再刊
示禁除嗣後務須做照內地民俗長幼有序男女
有別不得仍用火床坐卧混雜自喪廉恥如違查
出重責不貸

以上四條仰各處保正甲長牌頭人等逐戶傳
諭一體稟遵禁草以維風化以肅法紀毋得故
違自干咎戾特示

語言

土人稱天曰墨地曰理土亦曰理人曰那上聲日曰
硯月曰舒舒雲曰麥浪翁霧曰所帕風曰熱署大
雨曰墨者細雨曰墨者喧下雪曰舒舒者大山曰
卡科小山曰卡科鼻曰水轍河曰愛路曰喇池曰
熊節田曰夕列格火曰米燒水曰米那上聲炭曰什
體各落烘火曰土烏熱曰古冷曰撒樹曰卡木柴
曰卡物竹曰猛花曰卡帕吃酒曰熱胡吃茶曰燻
轍胡吃飯曰只架行曰喇兒坐曰猛背官曰夸民
曰馬那祖曰帕布祖母曰帕八父曰阿把母曰阿

捏伯曰阿取伯娘曰捏取叔曰阿卑孀娘曰阿蟻
 兄曰阿科弟曰阿米姊曰阿大妹亦曰阿米子曰
 必媳曰帕女曰必物外祖曰卡公外祖母曰卡布
 夫曰那^{上聲}把妻曰那^{上聲}假力閨女曰補逐作揖曰
 戳咱^音叩頭曰卡打背頭曰卡打眼曰落布眉曰
 落布須加鼻曰甕起面曰骨口曰哲齒曰是是舌
 曰亦臘鬚曰喇帕耳曰甕切手曰潔掌曰潔裡皮
 胸曰歷科冲肚曰阿拱足曰騎好看曰察裏察家
 醜曰奚臘笈曰捏哭曰齊水牛曰苑黃牛曰均均

馬仍曰馬羊曰弱猪曰止狗曰哈裏虎曰力猴曰
 額^{上聲}雞曰匝魚曰送鴨曰撒鷺曰壓碗曰切背杯
 曰切背背箸曰補止鍋曰踏枯桌曰席警椅曰科
 椅椏曰尖及一曰腦聾二曰捏聾三曰梭聾四曰
 惹聾五曰五聾六曰鶩聾七曰泥聾八曰節聾九
 曰格聾十曰黑聾一百曰那日屋戳金曰翁可銀
 曰我銅仍曰銅鐵曰寫錫曰言鹽曰臘布油曰設
 是醋曰奚扯穀曰力布米曰哲肉曰實帽曰毛衣
 曰西八袴曰枯被曰夕納鞋曰戳歇襪仍曰襪扣

子曰西八布插帶子曰麥肉臘欠債曰拖書曰赤讀書曰赤禿寫字曰赤赤鴨活曰赧跛大死曰赦胡說話曰煞力相打曰打偕青曰浪夾藍曰信夾紅曰米納節黃仍曰黃白曰阿使綠仍曰綠不知曰哈大睡曰列起曰住

麟

按土人言語呢喃難辨近開闢漸久能道官

音者十有五六

麟

履任來復遵

憲檄開義館

選師儒勤訓迪兼諭各鄉保隨時導引一切語言必照內地並舊時陋習盡為革除雖一齊衆

楚驟難改變而前唱後和猶可轉移附記於此以見化導之權仍在上也

藝文志

文以華國亦以徵心昔之賢者其人已往其事業治功亦不能親見獨賴其文著於簡篇垂諸後世使讀其書者景仰企慕以興起而效法焉所謂不朽有三言其一也永順初闢地文人學士固將有待前縣創志以改土時牌檄詳文同碑記詩草列入藝文竊謂檄詳既非藝文比且檄詳之事既以

備載志內各條無庸重見矣故擇其必當載者附叙入以前條項內餘俱節刪而碑記詩歌仍沿其舊有新得可採者亦增入焉至銅柱碑文暨土司舊志亦附於後用備參觀志藝文

廣元王伯麟識

記

新建永順府城垣記

知縣 李 瑾

永順古荒服之地舊隸土官宣慰司統三知州六長官司治之 本朝設流官同知副將各一員彈壓其地皆負險而居未有城郭雍正六年原宣慰司現任叅將世襲拖沙喇哈番彭肇槐輸誠獻土皇上准其請勅部行督撫議奏於是議改永順司為永順府以永順縣附郭分設龍山縣其保靖桑植皆設縣屬永順管轄所設員缺皆就近簡選調補而辰

府憲袁皆廉能素著遂調守永順時瑾任沅陵深愧德涼濫膺民社乃以附近永疆亦謬蒙一各上憲簡調疏入荷

恩旨俞允到任之日

詔發帑金建立城池先是 巡察御史唐 勘邊至永以猛洞之地曠濶平陽宜建城垣先行摺奏 巡撫都院趙 安輯六里率同文武等親臨相視僉以為可指示建設事宜以瑾為附郭首邑檄令董治其事適有吏書姚惟孝陰陽學陳紹堯皆善堪

輿隨同登山尋龍始知此地自湖北八面山起祖歷容美桑植至永順由武當山之東復折而西蜿蜒起伏至永順結玉屏開帳頓起觀音山層巒疊嶂落脉平陽結茲城局而左右隨龍之水直會於城局之南流出辰方且東則飛霞諸山龍勢飛舞西有掛榜諸山如倉庫如旗幡南則文星羅列水口完固果天然一都會之地千百年藏闕於此會蒙 皇上聖德神功度越千古始開建茲地創造城垣山明

水秀煥發於先天化日之中固斯民出草昧而遊
雍熙之幸亦斯地闢混沌而入文明之會也任是
役敢不矢公矢慎以奏乃績然受事之始初不知
土性多砂惟兢兢以物力維艱冒破國帑為念
請官莊以易民田剪荆棘而平溝阱審視量度命
匠估計佈城五里三分圍長九百五十四丈高一
丈九尺內外入土三尺用石墊底出土石砌三尺
土築一丈三尺又加女牆三尺東西南北議設五
門又設四水門城之上設五樓一十四砲樓一百

八十塚口估計土城詳憲咨部議允發項興工
孰知經營伊始各廟宇衙署所建垣墻隨築隨圯
始知苗土砂多未可以垂永遠與其於事後而受
賠補之累不若於先事而為一勞永逸之計爰請
命於府憲躊躇會計遂以改建石城具詳除動
用帑項外有不敷郡邑願捐養廉蒙各憲允准於
是鳩合匠作則有若攻石之工攻木之工攻鐵之
工搏埴之工設色之工皆聞風踵至分辦人役則
有若董伐石者董陶甃與堊者董甃築者董采運

木料者皆奔走趨事架屋以宿工匠其用五十有餘間修石以砌外城其用八萬四千二百一十塊有奇丁石以橫鉗其用四萬六千八百塊有奇大石以作靠其用四萬八千三百六十塊有奇內城純用荒石以壘築其用五萬四千五百一十塊有奇中用鶩石土泥夯築以實腹其用二千一百九十四兩五錢有奇頂用石板以蓋面其用一千三百四十六兩有奇至於綯甍以成墉濡堊以甃甍錘鐵以護重門需材以為板築為樓榭為車輪為

門扉為磚模為鞏架人工飯食費用浩繁他若開山有奠輦基有祀架梁有祀修槁運載以及廩給犒賞工食優卹之類備載籍中者又不一而足統計經費除國帑照原估冊奏報外所有零用府憲捐銀三千兩瑾亦捐養廉銀九百九十二兩經始於壬子之春落成於癸丑之夏不踰年而猛尚非復曩時之景象矣金湯在望磐石永奠樓閣崢嶸烟火稠密落成之日諸父老僉謂余躬親勞苦是宜有記以垂來禎殊不知此皆我

皇上至仁遠被山川効靈 各上憲籌畫周詳 府憲躬親指授故荒陬遠徼頓成都邑而瑾以菲材謬司其役得附名以垂不朽亦已幸矣夫何敢自以為功乎是為記

新建永順縣文廟碑記

知縣

李瑾

天下郡邑莫不立學校建宮墻以祀

先師孔子今永順新設郡縣奉

詔旨發帑金築城垣修學校議於府學外並建縣學遵郡尊表府憲指示度地於城之東北隅背坎面離山

明水秀天光煥發地德慈蔚卜吉興工中為大成殿東西為兩廡前為大成門又前為櫺星門門之內鑿泮池立園橋外監照牆左右為德配天地道貫古今坊大成門右為鄉賢祠左名宦祠左之上為崇聖宮前為明倫堂門牆具備皆照依內地制度崇宏堅固以肅觀瞻落成之日恭行祀事伏惟先師孔子為萬世帝王師歷代尊崇奉祀惟謹

本朝尊儒重道典禮之隆逾於往古我皇上聖學天縱道統淵源接乎洙泗

詔發帑金修闕里聖廟巍峩壯麗為從來所未有上梁之日輒感慶雲之瑞大工既竣復

命皇子親詣曲阜釋奠行禮又

詔修園陵牆垣增置廟中執事人員復通行直省各州縣以時修理載入交盤冊內蓋欲天下之大俊良之士遊聖人之門學聖人之道觀感興起以共奮於文明之中也况今日造士選士不一其途歲科兩試專拔正才鄉會兩闈務求實學又有選拔之典有廣額加額之恩有賢良方正之科有博學宏

詞之試闈門籲俊立賢無方較之虞商二代不已駕乎其上哉永順舊隸土司今

皇上鑒彭姓獻土之誠興建學校奉祀

先聖先賢安安神靈佑啓文教此爾士民千載一時也為士民者正宜父教其子兄教其弟勤學乎論學庸孟之旨專精乎易禮詩書之學究其廣大精微之蘊攻其規矩準繩之文且明乎人倫修乎德行探乎性理博乎史鑑以應學臣之試以入鄉薦之闈則由此而採芹香由此而歌鹿鳴由此而捷杏

苑內之入詞林步玉堂金馬外之膺宰牧縮墨綬
 銅章彬彬乎郁郁乎可與中州頡頏矣不寧惟是
 永順山水靈秀人物子弟固多雋異之質而永定
 衛地氣清嘉素有讀書能文之士沉鬱既久則其
 發舒也必長今文明蔚興傑人連茹而起竚見奇
 偉之彥接踵而上闕廷忠良之英比肩而立禁闥
 功勒鐘鼎名著旂常使後世之人屈指而數之曰
 某某名臣某某碩輔毓於學校自某年月日建學
 始則今日承乏者不且與有榮施哉爾士民勉之

余將拭目望之矣謹記

新建闕帝廟碑記

知縣

李瑾

國之大事在祀典永順新建城池工作並興
 郡尊袁府憲指示於朝陽門之正東恭建

帝神祠坐艮向坤山水映帶英靈之氣鬱鬱葱葱商
 之協臺王公僉以為可於是諏日鳩工身親督率
 務在崇宏堅緻以妥神靈以肅觀瞻經始於雍正
 十年二月十二日落成於雍正十一年九月二十
 日中建大殿五楹塑

聖像旁列左右侍衛兩廡各三楹繪

帝生前聖蹟六十圖重門外建戲臺一座大門內塑赤兔神馬并御馬者俾土人望之凜然如生起其敬畏後建祠三楹奉

聖帝三代木主廊廡門樓森然具備爰請府憲協臺同文武僚屬焚香酌醴割牲奠帛恭行祀事一時官生吏役父老子弟肅恭瞻拜莫不同聲贊嘆謂茲地之有此祠自今日始殿宇巍峩鳥草翬飛風馬雲車神威肅穆永民長受其祉皆守冷之賜也

孔子之為聖乃生民所未有

余謂
闕帝之為神亦生民所未有也生膺侯爵而歷代崇封由王而帝位號巍然廟祀通天下自王公學士以及愚夫愚婦莫不凜然敬奉戴若尊親我朝尤加尊禮追三代世襲五經博士京師廟宇易以黃瓦春秋祀典

詔直省郡縣一體遵行享祀之盛幾媿美尼山矣蓋聖帝忠義神武佐

天翊運無一日不周行於海嶽之間無一息不感通於
民物之表忠良正直則匡扶而安全之奸頑乖沴
則遏抑而殄滅之直欲九州之大萬國之遙一民
一物無不各得其所所以德與刑隨乎民以黃天
天參曠古獨隆也夫
天之心體萬物而不遺人心中各有一曰明曰旦之誠
亦之神周萬化而無間人心中亦各有一惟糾惟虔之
念故
帝之降鑒惟鑒乎其心人之昭事亦當事之以心非徒

曰入廟致敬已也惟茲永順蒙

聖天子仁恩普被易山巒草昧之習為聲名文物之邦

封疆各上憲郡守率邑令諸員咸欽奉

恩旨輕徭薄賦休養教誨以輯寧爾父老子弟飲和食

德熙熙皞皞同於中土今奉

詔動帑首建祠宇虔禮

天神為爾民請福祈年凡我父老子弟當念

皇上之恩同於覆載上憲之德隆於顧復

神靈之威嚴於指視忠孝友悌以立身慈惠敦睦以善

俗服勤力穡以供賦稅誦詩讀書以為國華則心與神合神必祐之富壽康寧之福集於爾身蕃衍昌熾之庥及於爾子孫豈不美哉豈不幸哉否則行負神明神降之罰守令雖欲為民請命不可得也於時父老子弟各稽首聽命唯唯而退遂勒此於碑永為警戒焉再有祠不可無田今置官田坐落畝畝歲收租穀該若干石付守祠者經理其事除養贍外其餘並作香火之資修理之費今將田畝坐落坵畝並收租數目勒之碑陰以垂不朽云

謹記 田畝詳祀典

新建永順縣城隍廟碑記

知縣 李 瑾

自京師以及各直省所在城邑皆建立

城隍神祠蓋城池隍土必有神以司之其神皆生有

功德於民歿為明神受

上帝勅命來掌一邦之陰教國家褒崇以時享祀為民

提福祈年歷代相沿載在典制彰彰可考也我

皇上心涵太極道協兩儀媿五帝而邁三王萬世莫加焉而敬

天事神無所不致其謹著為成例令天下郡邑修理城隍祠宇載入交盤冊內典至渥也今新闢永順詔發帑金建設城池興修祠宇縣隍祠卜建於城之東南隅甃石庀材工築並興經始於雍正十年十月十二日落成於雍正十二年二月二十日前奉部文惟立木主今於木主外復塑城隍神像並左右鬼判兩廡塑十二案曹官屬等後殿三楹塑寢宮像外三楹祀衛房聖母蓋土人冥然無識故體神道設教之意使之見像而懼生

其為善作福之心也廟像既設爰諏吉日恭備牲醴昭告於

大神之前惟茲永順新闢疆宇陰陽雖殊職守則一知縣愚昧無識謬膺斯土自揣德薄才疎欽承皇上撫綏化誨之諭旨暨

督撫 郡公各上憲指示教訓之親切籍戶口

定疆界修灘河開道路建橋樑平訟獄課耕稼興學校矢此精白之衷以勤以慎不敢怠忽因循期為斯民除百年之苛政沐今日之

新恩然皆循分供職並無奇績異政被我嘉師惟爾大神以聰明正直之德列文武聖神之班呼吸元功陶鑄羣品既受

皇

勅同掌邦政凡國計民生諸大事有利所當興而吏

未能興害所當除而吏未能除者祈垂

顯佑默啟愚衷若夫山林魍魎之呼嘯灘河鬼怪之

出沒虎豹豺狼之往來以及淫風怪雨之時乍旱

乾水溢之不常則

神之所司尤冀大彰靈鑒消患於未萌弭災於俄頃

以副

帝勅以佐

皇朝俾茲下民世受其祉明禋之報曷其有極於是再

拜致祝恍惚之中儼然愾然若有見焉若有聞焉

洋洋乎如在其上如在其左右則

神之昭鑒不爽也再有祠必有田今置田坐落坵墩

畝數付守祠之僧人除養贍外餘作香火之資用

刊碑陰以垂不朽云謹記

田畝詳祀典

桂香書院記

院即文昌祠

知縣

李

瑾

文廟既成爰於廟右捐建

文昌帝君祠題曰桂香書院曷為乎以桂香名也桂

香殿者

帝君之所居故建祠之所亦曰桂香也建祠也曷為
曰書院將延師聚徒講習於其中也蓋匡斗六星
為文昌之宿掌天上帝文章之府而

帝君以台斗星精生於周宣王時積功累行以孝友
同尹吉甫懋建明德其歿也神歸星府職司文昌
凡天下科名嗣祿咸屬職掌且歷代行化飛鸞闈

教諄諄然以忠孝仁義正人心而維世教其教人
也先德行而後文章科名嗣祿先後黜陟昭然不
爽從來讀書之士敬信佩服書冊所載可考而知
也昔我先王父雲溪公幼讀書於徵陽城北鳳翔
寺之文昌宮晨夕敬事久之夢

帝君召至座前自引左手刺右手指出血令王父吮
之吮訖驚覺心神開朗讀書數行並下遂博極羣
籍於五經性理史鑑諸子百家無不歷覽殆遍後來
登賢書白司鐸歷官巡撫凡建言敷政救災恤患

錫福黎元報効

朝廷皆若對越於

帝君之前遵體弗懈至作撫楚南時誠諭再三瑾敬

誌弗敢忘前任沅陵立

帝君像於城之西今新闢永順建祠設像以伸瞻仰
尤念天下直省郡邑莫不設立書院以興賢育才
今

神祠既建將進茲地俊良之士肄業其中遊桂香之
院侍

帝君之側以讀書而向學則其觀感也倍速其成就

更遠且大故題曰桂香書院所以遵祖訓而彰

神靈也第書院之設非徒務乎其名也入其中者當

念聖人之教首在明倫而務本

帝君以神道設教首在崇德行而立陰功本此以為
學則著為文章可以鼓吹休明見諸事業可以潤
澤治化於以登桂院而步金門是乃先王父垂誠
之心余今日所以捐建之意也多士其敬聽之哉

溪州銅柱記後晉

天策上將軍江南諸道都統楚王馬希範立
金紫光祿大夫檢校兵部尚書使持節溪州諸軍
事溪州刺史兼御史大夫上柱國長沙縣開國伯
食邑九伯戶五溪都團練史彭儒

天策府學士江南諸道都統掌書記通議大夫檢
校尚書左僕射兼御史大夫上柱國賜紫金魚袋

李宏臯撰

粵以天福五年歲在庚子夏五月楚王召天策府
學士李宏臯謂曰我烈祖昭靈王漢建武十八年

平徵側於龍編樹銅柱於象浦其銘曰金人汗出
鐵馬蹄堅子孫相連九九百年是知吾祖宗之慶
世緒綿遠則九九百年之運昌於南夏者乎今五
溪初寧羣帥內附古者天子銘德諸侯計功大夫
稱代必有刊勒垂諸簡編將立標題式昭恩信敢
繼前烈為吾紀焉 宏臯 承教濡毫載叙厥事蓋聞
梓扞接境盤瓠遺風因六子以分居入五溪而聚
族上古以為要服中古漸爾羈縻洎帥號精夫相
名媿氏 精夫相呼為媿徒 漢則宋均置吏稍靜溪

山唐則楊思興師遂開辰錦邇來豪右時恣陸梁
 去就任心否臧由已溪州彭士愁世傳郡印家總
 州兵布惠立威識恩知勸故能歷三四代長千萬
 夫非德教之所加豈簡書而可畏亦無辜於大國
 亦不虐於小民多自生知因而善處無何忽乘間
 隙隙古隙字俄至動搖我王每示含宏嘗加姑息
 漸為邊患深入郊圻剽掠耕桑侵暴辰澧疆吏告
 逼郡人失寧乍萌作孽之心偶昧戢兵之法知縱
 火果至自焚時

晉天子肇創丕基倚注雄德以
 文皇帝之徽號繼武穆王之令謨冊命我王開
 天策府天人降止備物在庭方振聲明又當昭泰
 眷言僻陋可俟綏懷而邊鄙上言各請効命王乃
 以靜江王指揮使劉勅率諸部將付以偏師鉦鼓
 之聲震動谿谷彼乃弁州保險結寨憑高唯有鳥
 飛謂無人到而劉勅虔遵廟算密運神機跨壑披
 崖臨危下瞰梯衝既合水泉無汲引之門樵採莫
 通糧糗乏轉輸之路固甘衿甲豈暇投戈彭師杲

為父輸誠束身納款我王愍其通變爰降招携崇
侯感德以歸周孟獲畏威而事蜀王曰古者叛
而伐之服而柔之不奪其財不貪其土前王典故
後代著龜吾伐叛柔懷敢無師古奪財貪地實所
不為乃依前奏授彭士愁溪州刺史就加檢校太
保諸子將使咸復職員錫賚有差俾安其土仍頒
廩粟大賑貧民乃遷州城於平岸溪之下將佐銜
恩向化請立柱以誓馬於戲
王者之師貴謀賤戰兵不染鏑士無告勞肅清五

溪震警百越永平疆理保乂邦家爾宜無擾耕桑
無焚廬舍無害樵牧無阻川塗勿矜激灑飛湍勿
恃懸崖絕壁荷君親之厚施我不徵求感天地之
至仁爾懷寧撫苟違誠誓是昧神祇垂於子孫庇
爾族類鐵碑可立敢忘賢哲之蹤銅柱堪銘願奉
祖宗之德宏阜仰遵王命謹作頌焉其詞曰昭靈
鑄柱垂英烈手執干戈征百越我王鑄柱庇黔黎
指畫風雷開五溪五溪之險不足恃我旅爭登若
平地五溪之衆不足憑我師輕躡如春水溪人畏

威仍感惠納質歸盟求立誓誓山川兮告鬼神保
 子孫兮千萬春 推誠奉節宏義功臣天策府都
 尉武安軍節度副使判內外諸司事永州團練使
 光祿大夫檢校太傅使持節永州諸軍事行永州
 刺史兼御史大夫上柱國扶風縣開國侯食邑一
 千戶馬希廣奉教監臨鑄造天福五年正月十九
 日溪州刺史彭士愁與五姓歸盟衆具件狀飲血
 求誓楚王畧其詞鑄於柱之一隅
 右據狀溪州靜邊都自古以來代無違背天福四

年九月蒙王庭發軍收討不順之人當都願將本
 管諸團百姓軍人及父祖本分田場土產歸蒙王
 化當州大鄉三亭兩縣若無稅課歸順之後請祇
 依舊額供輸不許管界團保軍人百姓亂入諸州
 四界劫掠該盜逃走戶人凡是王庭差細收買溪
 貨并都幕採伐土產不許輒有庇占其五姓主首
 州縣職掌有罪本都申上科懲如別無罪名請不
 降官軍攻討若有違誓約甘請准前差發大軍誅
 伐一心歸順王化永事明庭上對三十三天明神

下將宣祇為證者王曰爾能恭順我無科徭本州
賦租自為供贍本都兵士亦不抽差永無金草之
虞克保耕桑之業皇天后土山川鬼神吾之推誠
可以上鑒
銅柱高一丈二尺內入地六尺重五千觔並石蓮
花臺及
大晉天福五年歲次庚子七月甲子朔十八日辛
巳鑄八月甲午朔九日壬寅鑄十二月壬辰朔二
十日辛亥立

麟 按歐陽文忠公著五代史謂溪州刺史彭士
然率諸蠻攻澧州馬希範遣劉勅等擊之敗走
漿州遣其子師暉率諸蠻酋降希範乃立銅柱
為表命學士李臯銘云云宋馬端臨著文獻通
考亦以為彭士然今按銅柱鑄彭士愁而土司
宗圖亦載士愁而非士然及閱土司舊志乃知
士愁改名士然歐馬二公非無據也或以為士
愁則訛矣又撰銘者為李宏臯鑄刻現據非李
臯也

然假此夫天賦給法公李宏卓驗既既驗
 士發如公士發如公二公非與與必及以
 宗國亦難士發而北士發及關土同書亦
 亦亦以亦亦亦亦亦亦亦亦亦亦亦亦亦
 亦亦命學士亦亦亦亦亦亦亦亦亦亦亦亦亦

詩歌

國朝

北河行

雲南舉人

許鑑衡 字源

天下灘河稱奇險川陝閩江未曾見鎮遠沅州歎
 路難賴石遜之多危灘詎自辰州上北河河勢漸
 高如登坡初經虎口石搓捋昔年馬王不敢過鳳
 灘三疊險無比茨灘鬼灘石齒齒蛟龍怒噴雪浪
 濤雪花激射百尺高野鬼吹風草木號鼉鼉蹲坐
 氣何驕舟人扛舟入港口行人捨舟靠石走攀蘿

緣崖如猿獠眼望驚灘怯回首行行趨拜伏波祠
下灘船皆如箭馳舟楫出沒浪波裡水濺竹蓬濕
淋漓我謂北河之險險如此人胡為乎同至止舟
子語客勿相驚先時勢若浩縱橫自從土官獻土
築邊城

發帑疏通河路平令尹賢且才巡督河之隈鑿去怪
石數百堆何懼灘聲響若雷吾儕河上日徘徊不
聞帆傾與楫推

銅柱歌

會溪山水鬱嵯峩巍然銅柱立山坡聞昔馬王據
辰州界分漢土鎮山河變幻幾千春荒陬一
柱何嶙峋定臯銘辭捫可識信知呵護有鬼神當
年鑄此威蠻疆而今蠻土列冠裳猶令往來舟上
客太息英風未渺茫

舟至王村

前人

舟過溪灣無浪痕晚烟飄緲見王村東西岸岸環
茅屋崖嶂層層列市門宵聽隣船呼酒劇晚聞山
寺讀書喧遠來最愛民風美喜到新疆可細論

永順八景

玉屏煥彩

前人

混沌開闢此山川誰置玉屏倚青天
東西南北擁儀仗千岩萬壑飛紫烟

聖主

當陽開郡縣邊疆草木皆蔥蒨
樓臺璀璨雉堞雄屏間煥彩開生面
千家烟火望中新衢巷時有咏歌人
龔黃卓魯接踵至會見郊原遊鳳麟

文峯擁秀

猛崗之南有三峯中峯高聳插太空
兩邊扳秀出

雲表儼如簇簇菡萏位駐南離森相向
奎章應煥三台上如何草昧千百年
至今乃見文明狀山水之應古無訛
高城見立瑞光多從茲鍾毓多賢
俊珥筆鳳沼鳴玉珂

榜岫雲晴

朝來攬秀向西山白雲飛到忽迷漫
日霽清風吹岩岫朗朗山容披翠環
茲山人共稱天榜混沌生來酷相徼
若非盛朝開邊徼連峯排漢誰來賞
山呈榜字掛晴暉似有丹文映紫微
他日南宮聽

臚唱還看卿雲五色飛

福嶺霞蒸

福德山擁郡城東翠削芙蓉插太空朝來宿霧霏
雲嶂晚霽明霞鬱蔥龍山畔周遭結茅屋或耕或
漁或樵牧近來栴花竹樹裏讀書吟咏滿空谷白
髮披頭數老叟舊同司官効奔走自言生長八十
餘今得嬉然酌斗酒

雙溪夜月

永順之城夾雙溪溪流委宛淨無泥清夜碧空無

纖翳忽看寶鏡涵東西東城練影披樓閣西城燦
爛亦相若銀河耿耿度雲外交光上下射簾幙梅
花晴雪點溪灣萬里春來霄漢間主人浚夜勸春
酌憑將溪月照酡顏

龍洞朝雲

遙指飛霞山之半古洞玲瓏岩石畔千年住有老
神龍頭角浚潛不可見朝看洞口白雲外知是蟠
鱗上碧峯須臾雷電響幽谷風伯雨師競相從濛
濛霏灑遍郊原土人歡呼惠澤繁會須為霖在天

下蒼生涵濡感勿諼

河港溫泉

南河河港瀉溫泉千百年來名不傳令尹乘舟過
其下煖氣騰騰飛紫烟停槳探之手可掬肌膚著
水白如玉惜哉無處構亭臺帳幔為作石邊屋吾
滇溫泉出螳螂稱為天下第一湯此泉清澄能相
似披襟忘却是他鄉

連橋新市

瞥見江城如畫裏更喜雙橋落彩虹行人緩控紫

駟馬橋亭香霧散春風倚欄商市相攢簇土巾苗
錦光耀目亦有客來江左右越綾吳紵堆茅屋夜
溪燈火照江頭父老啣盃笑盈眸共言此地再十
載不亞辰州與沅州

玉屏煥彩

雲南拔貢

徐純仁

荒陬開大郡形勝亦奇哉平地玉屏擁遠山雙水
來珠樓依碧嶂翠館除蕪菜曉日曛曛起光彩慶
昭回

文峯擁秀

城隅分二水江外擁三山
挿漢撐天柱拂空列翠
鬢筆搖星斗上墨潑柳溪灣
應有高才輩敷文殿
陛間

龍洞朝雲

霞嶺藏深洞何年臥老龍
朝飛雲一片眼見雨千
峯葱蒨溪州草歡歌石戶農
會須陳惠澤同受

聖朝封

連橋新市

最愛城東郭沿溪橋復橋
蜃樓開碧水虹影落青

熙朝

霄客集舟車遠貨通吳越
遙往來稱樂國皞皞

土屏煥彩

邑令 李 瑾

北峯千疊似鸞停誰向峯頭列玉屏
日麗瑤光開岫翠雪晴素靄漾天青
五門城郭雲中見萬里謳歌域外聽
共慶

皇仁開遠徼競揮綵筆紀山靈

文峯擁翠

新闢高城倚北極仰看玉笋擁南離
雲晴翠岫縈

青靄雨霽連岑挂紫霓筆勢欲凌星漢表奎章應
照鳳凰池地靈有待鍾人傑蔚起文明應在茲

榜岫雲晴

筆立西山勢若屯儼如蕊榜挂天門宵分霧鎖峯
微見晨霽雲晴翠可捫石上疑存蝌蚪字岡頭恍
見虎龍痕從茲闢地開文運鎖院題名上

帝閣

福嶺霞蒸

東向巍然福祿山蒼龍騰躍復廻環凌晨霞湧浮

銀幌鎮日曦明擁翠鬟紫氣葱蘢青漢外晴光罨
藹綠楊灣夕陽嶺下人歌咏樂國新開任徃還

龍洞朝雲

飛霞山半洞玲瓏洞裏何年住老龍朝吐寸雲飄
上界刻施甘雨灑諸峯雷聲過處烟千縷虹彩飛
來翠幾重若教為霖敷下土九州歌咏遍三農

雙溪夜月

東西郭外夾溪流二水溶溶瀉碧湫一派波光搖
素練幾重蟾影盪銀毬雪翻石嶼羣鷗靜翠滌烟

林古木秋夜靜浮槎吹鐵笛蘆花岸似鳳麟洲

河港溫泉

雙水溶溶注北河欣看河港沸溫波誰將玉鼎燒
靈礬常瀉金漿煮石蘿域外華清塵跡少江間雪
乳妙香多幾回浴罷臨流坐把酒呼朋共放歌

連橋新市

江流疊疊注城東連築橋梁曳彩虹亭榭參差烟
雨外市廛掩映水波中叟童歌咏千村集商賈嬉
遊百貨通忽憶輶車來猛尚荒田野水望迷朦

靈溪十景

照土司舊志摘錄朝代未詳

福石喬木

森森喬木武侯祠培植全憑雨露私陰蓋柳營應
闢地根連銅柱自當時日中解走龍蛇影霜後難
雕虎豹姿入眼總誇廊廟具掄才端合問工師

又

周惠疇字寶卿

長松矯矯柏森森交翠亭前匝地陰一徑莓苔青
印屐四簷風露冷沾襟摘花送酒春長在對鶴吟
詩暑不侵乘興登臨吟眺處數聲啼鳥晝沉沉

雅意甘泉

九成宮中湧仙醴清冷遠在金山寺平泉宰相善
評騰遣使乘舟渡楊子我生好奇無與比仗策空
山訪清泚香沁入口煩暑蠲令人却憶置郵傳

又

解元 唐 寅

山川浮雲即渺茫山間流水玉輝光千尋百練懸
崖落一道銀河到海長和月掬來還有影帶花汲
去豈無香隨流好入華陽洞莫向天台問阮郎

繡屏拱座

文 澍

五老峯前錦繡峯天風吹落靈溪口由来造化妙
莫測能使山川自奔走光風轉蕙萬木榮百花搖
映溪水明幽人憑几看不厭隔林黃鳥時嚶嚶

又

周惠疇

堆青疊翠萬千重秀拔廬山五老峯海上屏開金
孔雀屋西簾捲玉芙蓉竹間月轉篩花影松徑苔
深印鶴蹤明說仙都風景異何由縮地一相從

玉笋參天

辰陽 張 明 千戶

誰植琅玕在太空巋然屹立倚崆峒鐵錐倒卓撐

銀漢冰柱移來插玉峯貞固肯教風雨壞侵凌不
許蘚苔封

聖朝久託為梁棟萬古擎天永賴功

古峯 孫 禎

又

北窓延竚指修篁枝葉蕭疎壁立長疑是殘虹懸
漢碧依然神劍倚空蒼此時榜石君還愛他日中
流我自將夜陟危樓成想像老人扶杖五雲鄉

石橋仙渡

華亭 顧 清 編修

雲根一片落前洲曾是仙人玉斧修絕岸巧通芳

徑去細波長共遠山浮苔文想像空飛鳥樹影參
差壑駕舟聞道石欄容點筆凌風我欲試清遊

又

陳 珂

古橋結構不知年此地猶聞說地仙車下任題司
馬筆海東堪笑祖龍鞭源頭雨過長虹偃水面風
清片月懸廬嶽三梁何處是只應從躡北雲巔

翠窰晴嵐

干戶 許 寬

蒼碧崖前展幕輕初看畧約漸分明映霞不作朝
雲態曛日微含暮靄晴濃著薜蘿青欲滴淺籠峯

嶂翠堪傾雖然亦是山川氣難會靈氛變化清

又

知縣 李 靳

萬仞崔巍壁立山個中風景別人間虛涵浩氣春
恒在靜閉塵囂夜不關月薜蘿籠翠靄雲蘿紛
繞帶蒼顏何年得入靈溪境吟對樽前着意看

羊峯毓秀

司副 譚玉瑞

疊疊東來擁翠巒一峯羊肖此中蟠左慈漫向人
前化蘇武偏宜雪裡看風動雙尖宜觸角雲歸六
合若為欄無端淑氣鍾邦彥寶藏斯興盡等閒

又

知府 許 節

排闥山巒擁翠圍天芳喬秀奪天機晴開樹杪千
岩碧淡抹峯腰斜日暉瑞氣烟光雲卷畫藤蔓苔
古石生衣尋詩幾欲添毫放啼鳥連聲青嶂飛

龍洞鍾靈

虬蟠此洞肇何年曾鼓雄濤列海邊千里高原覃
雨露半溪溟色抹風烟可令文字同盤谷誰使丹
青獨輞川幾度醉遊明月夜滿天青逼賞心舫

又

凌雲 安 佑

百尺潛蛟石眼沒，崢嶸勢底奏泉琴。巨靈是有騰
雲象，雄抱寧無澤物心。幻說共猜羊兔跡，活源誰
識古今音。何當載酒尋遊遍，斷送詩情仔細吟。

柳溪夜月

周惠疇

溪流十里碧溶溶，行自青青蓼自紅。花伴鷗眠沙
渚上，雲移山入酒杯中。一聲長籟風生浦，數着殘
棋月滿空。半點紅塵飛不到，賞心人在水晶宮。

又

山陰王經長史

西崖月出倒溪流，此是人間別樣秋。萬古清光淨

宇宙，九天涼影動瀛洲。水晶澄潔渾無夜，簾幕蘊
縻不掛鈞。欲聽霓裳羽衣曲，廣寒宮殿幾時遊。

銅柱秋風

周惠疇

黃金鑄就幾千年，勝跡曾聞父老傳。眼底千峯皆
委地，掌中一柱獨擎天。影橫西海龍驚蟄，光照南
山鶴不眠。碧草白沙相對晚，涼颼兩袖襲詩仙。

又

丁璿

範銅作柱已多時，屹向秋風振武威。欲擬堅貞扶
至治，不將虛美樹豐碑。孤高應與天休匹，鎮重當

為世表儀萬綠千紅常點綴將壇寓目更清奇
顆砂八景照土司舊志摘錄朝代未詳

奇峯聳碧

衡州王相

羣峯壓盡此峯高百丈飛泉白晝號雲淨滿川鋪
素練春深萬水着青袍清風千古增雄峙明月無
窮占世豪潦倒何時一登眺結廬還可咏離騷

清野流雲

豐樂亭前禾黍香登臨白晝細生涼高低竹石浮
青綠遠近山巒擁翠蒼花塢春深情自適漁歌日

暮醉成狂溪山元是安邦手移得蓬萊到此方

北嶺樵歌

萬木森森石逕賒背崖茅屋兩三家丁丁伐木聲
相應嘒嘒歌雲聽轉嘉澗外野猿啼古樹天邊孤
鴈伴殘霞負薪多少南村叟唱和歸來日已斜

東江漁火

胡應先

凭欄俯瞰大江東最愛溪邊晚釣翁餌釣纔教登
一葉藤蓑便不換三公吳鱸出躍風濤靜楚竹燃
燒蠟炬紅我亦有釣慙太直不知亦可戀魚叢

竹橋吟晚
 萬箇篔簹護小橋偶來登晚興飄飄泉香一派流
 寒玉山色無端展翠綃倚檻頓令消俗慮書空斷
 不羨時豪沉吟幾度歸來晚戍鼓聲中月正高

松塢棊聲

潘日棠

芙蓉削翠亂峯圍拔地虬龍競落暉宏景坐忘風
 滿耳謝安對局草侵衣細聽剝啄尋三徑笑看縱
 橫任一機明月下林宜擺手前溪恐悞鶴來歸

平川霽月

王相

渺渺秋空一片冰寒泉流出自澄澄亭虛篆碧光
 涵潤句好流觴興轉騰埜竹覆欄清露重山松匝
 澗翠雲層何時把酒頻相過淨洗塵襟坐月明

老圃寒香

胡應先

老圃天成景最奇蒼崖壁立映天池靈根自得神
 仙種皓色其如水玉姿踈影晴香渾莫敵玉堂茅
 舍總相宜獨憐冷落時光裏惟有逋仙是故知

溫泉

湖南學院

鄭虎文

亂山深處溫泉多烟埋雲翳無人過玉屏之山翠

永順縣志 卷四
環郭泉生其麓臨溪河岸通樵汲水賈泊䟽鑿偈
仄開烟蘿地靈到此惜不得象晦獨顯名難磨吾
行按試畢科歲士習淳樸蠲煩苛頌聲未敢信碑
口歸旌暫駐來巖阿因呼朋儕却騶從微徑确犖
周盤陀隔溪峭壁立積鐵環泉練帶鋪青蘿一泓
下徹鏡開匣千漚上汎星流波有聲無臭空是色
煉陰鑄陽中而和解衣就浴試深淺如鼎不沸供
摩挲浮光著體螢寒玉仗火入腹攻沉疴徃聞人
來春夏日澗浚泉沒疑傳訛希聲蓄實似珠玉方

流圓折空描摩小春天氣風日好而吾適到非天
何似憐此身本無垢緇塵久染羞媿媿濯纓濯足
與所便枕流漱石原殊科昨經茅坪歷高望俯身
禹仞如投梭暫蘊喘息悸未定得此庶足駭愁魔
獨憐茲泉落蠻傲欲齒名勝憂譏訶官清俗陋不
好事誰與點染資吟哦彞童苗婦恣穢褻寒猿野
鹿相騰那網羅才俊漏草莽同此淪落悲蹉跎披
衣太息坐盤石柱杖緩步升危坡臨流何人問牛
飲閉戶有客眠鷄窠幸無盤筵污遊歷永絕車騎

驚麾阿維名累人終累已以無名故無轍軻華清
流艷此流潔俛仰今古生愁歌芙蓉含笑向幽澗
落日送影啣青螺徘徊林壑未忍去留題吾欲鵠
嵯峨

永城閒述

鄭虎文

斗大一城耳森然萬壑秋有山皆絕壁無水不懸
流虛谷風聲怒晴空霧氣稠客身憂瘴厲九月已
重裘

山外原無地山頭尚有田刀耕農當鉅火種野無

烟灌溉難為力榮枯只問天傳聞春夏日比歲雨
綿綿

民勤憐俗儉婦女共耕樵露粟腰鑷刈山蔬背籠
挑珥渾垂臂釧裳偶飾鮫綃蓬跣慙相顧逢人欲
諱苗

頗愛民風古尤欣士習淳到知官吏重訟得是非
真耕鑿皆樂土文章未致身恍遊懷葛世絕勝武
陵春

同官讌集衍真西山湘亭屬諭詩示僚友八首

知府李拔

從來官吏與斯民大造生成賦予均豈俟陳風知
 好惡設身處地即同仁
 本是同胞一體親胡為秦越視羣倫好將民事為
 家事漫道纓冠救比鄰
 既以脂膏供爾祿繭絲何用空杼軸庶泉自飲少
 追呼人過石壕無夜哭
 須知痛癢切吾身勿逞刑威喜更嗔堂下剝膚皆
 赤子那無洒淚共呻吟

此邦素號唐朝古士樸民淳歌樂土爭說昔賢過
 化鄉政聲誰接前人武

我輩當如漢吏循龔黃遺軌尚堪遵雉馴虎渡非
 神術只在慈祥片念真

今日湘亭一杯酒芳香滴滴三農手勸君舉解細
 思量父母之名曾副否

敢煩散作十分春莫戀醪醑獨飲醇解使陽和生
 黍谷宰官何處不經綸

首夏遊觀音巖

知府陳疇

受姓瞿曇石相尊楊枝甘露灑山門慈航兩岸懸
崖渡佛火千家寶鼎温上界逍遙迎法服下方歡
喜覓祇園溪南日午清和後曲磴探幽聽鳥喧

和韻

知縣 黃德基

太守經臨古刹尊曇花引步耀沙門天成佛子溪
干現地接湯泉浴裏温未策鈴鞭隨憲節懸知鹿
苑勝名園麥秋點綴岩間色盥誦鴻吟滌盡喧

又

教授 關天申

法像無遮第一尊天然絕壁鎮山門蓮花座湧仙

峯翠寶炬燈傳遠水温四大高懸空色相衆香遙
指散林園公餘偶步探幽境竹馬歡迎頌禱喧

又

訓導 王繡茂

祇今何處禮慈尊猛嶺宏開不二門白鳥雲中啼
般若元猿月下叙寒温一絲未挂真如體萬象皆
空自在園政簡刑清無箇事聊從此地避塵喧

又

拔貢 鍾兆亨

應世釋迦千古尊莊嚴妙相耀禪門祥光縹緲金
容現瑞氣薰蒸玉鼎温石壁斑封懸鷲嶺溪泉碧

漲繞雞園五花踏處甘霖潤笑指兒童竹馬喧

又

拔貢朱得勝

何年飛到普陀尊峭壁高懸幻化門十丈蓮峯空
色相九天甘露洒清温雲依翠藹環山頂鳥近慈

悲集佛園一自福星臨水月溪聲响答頌聲喧

又

邑廩生黃光燦

蓮座天然法相尊登臨髣髴叩雲門枝垂峭壁山
如畫露灑清泉水自温翠竹黃花迎馬首長松細
草繞雞園朱幡到處徵星聚鳥語聲傳梵唄喧

又

邑增生向萬河

天產靈岩佛一尊郡城倚重鎮沙門嶙峋後擁阿
羅肅澄澈前流玉露温擬是普陀離海岸飛來猛
崗現祇園惠風和暢香風溢幽壑欣聞五馬喧

又

邑增生黃光曙

寶珞莊嚴世所尊離南位它接雲門祥開覺路荒
山破瑞汎慈航碧澗温髻峙不殊登鷲嶺燈傳何
用訪雞園蓮花座就天然異五馬臨時百鳥喧
永城八景

黌宮雙桂

永順府學教授係湖北庚辰科舉人 關天申

南來溪崗郡暑退氣微涼馥郁三秋桂輝煌數仞墻

高低連洋藻左右噴天香盼望蟾宮影清芬挹玉堂

池水綠荷 在洋池左

冷署清泉冽荷香萬點叢碧筒朝滴露翠蓋午臨

風曲曲迎溪水田田繞洋宮頻將文會友社結晉

陶公

東廠騎射 在考棚左

盛世威光遠軍營細柳同干城心腹壯步伐止齋雄鎖

院瞻天祿兵符握石公邊防籌勝算不用柱標

銅

西城武庫

偶步西城角青霜紫電傳貔貅環架戟雉堞靜風

煙徹札穿楊枝韜戈息甲年承平知日久緩咏樂

微員

山寺晚鐘

溪靈多古刹鞞鞞晚來清夜月高僧詠寒山遠寺

聲聞聽鏗立號出度紀兼平窈榭渾難辨南樓迭

報更

桂閣書聲

崇文書院原名桂香閣

菁莪宏雅化藝苑奮窮經秀色山開榜文萃玉作
屏吟唔溪尚月焜耀紫垣星勸學箴勤讀廣歌奏

關廷

郵亭秋稼

彌望東關外村煙雜市橋淺深溪澗水秀實隴頭
苗穀熟腰鎌刈擔盈背籠挑驛亭堪作畫井里樂

熙朝

榜岫樵歌

峭壁偏臨水夕陽影半遮樵通城郭路擔負土苗
家野渡舟橫茂村歌笛短斜寒來煨榾拙松嶺是
生涯

王村八景

崖壁箭磐

貢生 陳瓚

峭壁聳江干千年古箭攢雙鵬期中翻一天穩懸
磐巧力仙人授弓張古樹蟠修文兼武備狸首壯
赴桓

龍洞烟雨

古洞深千尺龍宮隱現奇
乘風銀浪鼓觸石翠烟
瀾瀑布驚雷吼懸岩吐霧垂
會當神變化奮鬣躍
天池

澄潭夜月

十里澄潭迥秋來靜似羅
高峰垂練影孤月愧銀
波夾岸鐘聲寂綠村晚翠和危樓憑眺賞涓滌俗
塵多

懸流石徑

懸流百尺掛珠簾水底巖廊徑可穿
隔岸不愁春夏漲相將渡出洞中天

瀑布雷聲

廩生 楊大勇

千尋瀑布勢淙淙激石聲騰震遠峰
兩岸層巖巖上寺風清月夜定僧鐘

釀溪如帶

溪流碧綠出村南瀉入前河一色涵
惟有四山新雨歇涓涓如帶遠拖藍

大觀山寺

寺立山巔出萬重巍峩隱隱慶雲封登高放眼餘
千里黔蜀沅湘積翠濃

天產石芝

劍南府憲李 誥 板題刻

嶺外靈根結天然產石芝九莖符鳳腦三秀薦仙
肌雨濕苔仍護風高葉不垂劍南傳勝蹟玉露藉
培滋

續成永順八景

玉屏煥彩

邑廩生 黃光燦

山屏矗起抱城闕異彩紛披玉筍班苔點何須疑

墨誤踏歌好似看珠還雲藏翠色千重繞雪映嵐
光四面環石壁天然堪入畫方流疊帶水潺湲

文峯擁秀

邑增生 向萬河

離峯秀峙聳雄文翠擁南闕氣勢薰峭壁千尋常
倚漢孤標百尺自凌雲三山突立峨嵋現二水迴
環燕尾分妙筆何須勒斧鑿天然藻采共續紛

榜岫雲晴

邑增生 黃光曙

蕊榜天開曉色悠高懸隱躍虎龍頭苔痕鬚鬢疑
殊點草色依稀墨鈎霧結層巖分甲乙烟籠磊

石揭春秋聯翩姓氏瞻雲表拾翠臚傳第一籌

福嶺霞蒸

邑庠生 楊文德

麗彩薰蒸五色明天排福石護山城崔嵬翠點籠
朝霽縹緲光騰襯晚晴綺向峯頭催霧散文從物
外傍雲生紅綃冠嶺凌仙幔孤鷺歸鴻往復迎

雙溪夜月

武陵貢生 劉士任

玉兔空明萬里天雙溪碧水共澄鮮波流半湧重
輪漾浪靜平分兩鏡懸皎潔清輝光激射玲瓏皓
彩壁交聯蚌胎應向姮娥轉孕育珍珠箇箇圓

龍洞朝雲

邑庠生 滕興鰲

古洞昭靈秀氣鍾為霖作雨起潛龍晨飛靉靄迷
青嶂曉噴氤氳罩翠峯莫遣寒流青蘚匝休教浩
氣白雲封幾回欲向天池躍變化升騰到九重

河港溫泉

邑廩生 陳君弼

靈機活潑湧溫泉和氣薰蒸意爽然日射平沙清
見底風翻素練碧浮川湯池自煖還嫌沸火井同
炊尚礙烟勝地應追沂水樂臨流歌詠際 光天
連橋新市

城東兩水阻征鑣次第橫空駕板橋駐足誰為題
柱客息肩時有採山樵亭高捧日驅朝市水漲凭
欄看晚潮自是樂郊多利涉前府憲駱匾霓拖
虹飲興偏饒

溫泉

朱得勝

一帶清流漾碧川城南數里瀉溫泉溪流曉日含
春意岸對晴嵐透暖烟水到渠成機活潑雲蒸霞
蔚境澄鮮當年沂浴傳佳景上下波光共往還
銅柱 滕興鰲

盛世壯邊巖

危灘環遶一峯巉銅柱高標鎮碧岳當日忽通南
下瀨至今不斷北來帆龍編紀蹟將軍命天策揮
毫學士銜指點會溪銘象浦千年

又

庠生 鄭世玉

盛世千秋柱記永垂名

銅標丈二勢崢嶸矗立河干守舊盟鏤列鴻文昭
績樹追蹤象浦表功成茅坪谷裏山增色石瀨灘
頭水助聲帶礪於今歸

題蟠桃菴

在土司舊治顆砂保

增生 鄧國珍

古寺名蟠桃建置山之麓有山清且幽蒼松兼翠竹山外雜流泉潺湲時飛瀑殿宇大觀瞻莊嚴法像肅日久漸傾頽藤蘿穿林木寺僧募重修次第營工築浮屠勢嶙峋碑紀堪徃復依然擬蘭亭拈花句可讀彷彿遊祇園曲徑豁心目鐘聲繞烟雲野景入畫軸珥筆誌形勝

皇圖壯山谷

人物志

十室之邑必有忠信永雖僻處邊隅而千百年來豈乏人才祇以向隸土司或因採訪不及遂至湮沒弗彰今值開闢漸久教化日新人文蔚起當必賢才輩出以為一邑光者前縣創備志乘將彭氏土官之有功於國賜秩褒封者詳為之載即非土官而行誼表著曾經詳請旌獎者亦書之以備人物之選今亦仍其舊兼為採訪當前苟見聞可據一善必錄以示鼓舞且維風化云志人物

彭氏勲勞

彭城 江西吉安府吉水縣人梁開平間朝命授金紫光祿大夫檢校司徒溪州刺史為永順司始祖

彭師宴 宋熙寧中有布衣張翹上書陳北江利害朝議以章惇為湖北提刑經制蠻事師宴會惇以事上聞詔褒之遂築下溪州城賜名會溪授師宴禮賓副使

彭思萬 元世祖至元十六年內附朝見賜宣命

印章授武德將軍

彭天寶 洪武三年賜誥命陞永順軍民宣撫使司宣撫使進階宣武將軍六年改陞宣慰使司宣慰使頒給印信十二年總兵楊仲銘調征大小鉛廠二十二年東川侯晉寧侯調征安福夏二向天福斬獲天黃地黃等級並生擒解驗捷間奉勅獎

彭仲 永樂十八年總兵官蕭綬奉勅調征岩頭等處十二年征斡子苗寇宣德七年同子

世雄征夫小荷蓬等數役斬首獲俘所向克捷
奏報奉勅屢加獎勞

彭世雄 字人望仲之子先從父兩征荷蓬鎮算
奏捷正統十四年奉勅調隨靖遠伯征討清浪
景泰六年從南和伯征五開銅鼓天順二年征
貴州東苗凡三役皆奏奇功奉勅褒獎

彭顯英 世雄孫父瑄早故天順六年奉勅調征
桂陽苗寇七年調征天柱南洞叛賊成化元年
奉勅調征大藤峽徭賊二年勅征襄陽流民三

年勅討貴州山都掌並四川大壩寇賊四年勅
征四川西袋賊十一年又討平九甫二塘判賊
十三年屢以戰功奏捷降勅進階懷遠將軍十
三年進階昭勇將軍十四年調征永寧州賊奏
捷奉勅獎賞

彭世麟 字天祥洪治五年奉勅調征施州銀山
嶺判賊勦獲俘級解官六年調征貴州都清地
方判賊九年進階昭勇將軍十四年自願奮身
征武岡苗寇降勅褒獎十七年調征廣西思恩

府逆賊岑濬俘獲賊首奉勅獎諭正德元年兩廣御史以世麒討賊前功奏請進階昭毅將軍賜飛魚服色尋降勅調征陝西漢中府四川僭號刮地王俘獲解驗七年朝廷營建自備金採買合式大木奏獻調征郴桂苗叛兄獲延溪大王解驗十三年以解木功並屢獲俘功蹟奉勅加陞湖南都司都指揮使賜大紅蟒衣三襲隨因郴桂勞蹟奉勅進龍虎將軍上護軍正一品服色誥命郴桂耆民奏公號令嚴明民不知擾

賜建坊上刻玉音勅賜並表勞二字二十餘年奇功茂蹟人皆瞻仰焉

彭明輔 號德軒世麒子正德七年隨父奉調征貴州銅仁苗寇奏捷尋隨父進大木奉勅獎勵是秋貴州香爐苗賊叛奉檄率兵征勦十二年奉檄克破土堯險寨生擒苗阿傍阿浪等首解驗十三年奉勅加陞湖南都司都指揮使正二品進階驃騎將軍賜大紅飛魚服三襲尋以勞憊命長子宗漢任事以克險寨擒斬首惡准令

承襲宗漢卒無嗣令以次子宗舜任事是年廣西思恩賊叛父子率兵進勦叛賊聞風自降續奉新建伯王尚書守仁檄父子克破牛腸寨俘獲解報後宗舜卒孫幼奉勅明輔仍復署政率孫翼雲翼南先後屢建大功疊蒙勅諭

彭宗舜 號中軒明輔子嘉靖六年廣西思恩惡目反奉檄征勦南寧間歸降又征潯州斬獲賊級解報後以屢征有功降勅加級授昭勇將軍彭翼南 字晉卿嘉靖三十四年南倭寇亂湖州

馮總督檄令同徂征討平望驛陸涇塘等處任賊解驗三十五年南倭復寇奉調赴浙克捷奏報進階昭毅將軍尋蒙趙提督胡總督題叙前功奉勅陞雲南布政使司叅政復賜銀緞以旌懋功

彭永年 字汝訓翼南子萬曆元年湖廣廣西巡撫調永年兵征勦廣西徭寇大破巢穴斬擒三百餘解驗事聞禮部議奏賚賜欽賞六年先有妖賊金雲峯等遣黨楊時貢傳送大乾啟運圖

一錄印刻妖書至司永年奮然擒解辰沅各道
詳報奉勅進驃騎將軍特加正一品服色
彭元錦號衷白萬歷十五年播州叛蒙督部檄
元錦征勦乾溪苦茶園等關攻進海龍等壘斬
獲賊級解驗奏題優叙先因採獻大木助修清
寧宮工部題准加級奉勅加飛魚服色陞授湖
廣都司都指揮使進階驃騎將軍
彭宏澍字海若順治四年本朝寧南大將軍
恭順王臨辰宏澍遣員獻輿圖冊歸命拔誠八

年高李郝黨盤踞內境宏澍簡兵衝殺宵遁十
三年大將軍阿固山額真卓經畧內院洪會題
永順久經投誠請鑄給印信欽賞十四年加太
保賞坐蟒貂帽靴襪等物欽頒順字號永順
等處軍民宣慰使司印信一顆以示恩賚
彭廷椿號梁卿元錦胞弟元鉦子因二三房無
嗣輪應承嚴先因彭允植越立廷椿父子遠避
桑植不數月允植天故州司舍把乃遠迎歸司
值吳逆叛楚盤踞荆湖及大兵臨楚偽逆恢平

廷椿父子首倡向化並申繳宣慰經歷偽劄二張偽印二顆及新獻雷公嘴鉄廠投誠將軍部院發給宣慰號紙一道並給其子總兵官劄副一道密諭進勦神龍關取道機宜子宏海率領苗土勁兵三千自裹餼糧駐劄王村拒賊上游由高望抵辰州府上聞欽頒康字號永順等處軍民宣慰印信一顆後因朝廷營建太和殿助採大木運交辰州府恩加十級歷任十三年急公報効竭忠宣力可謂賢矣

彭宏海 潤達大度能撫恤苗土附近邊人多歸

之外來客旅亦加禮待一時稱為賢司官子肇

槐繼立居官醇謹並能輸誠獻土亦賢矣哉

耆德 孝義附

彭可成李鍾杰張宗文彭冲林彭 元 永順縣

人皆耆壽雍正八年旌鍾杰善醫遠地貧家有

招輒往雍正六年行鄉飲禮舉介賓

王世茂 本城保人父惟順久病世茂割股療之

尋愈

田宇 施溶保民家貧母石氏素病心痛每發輒欲自戕宇率妻龔氏保護甚謹乾隆四年母病負痛走出宇覺趨救石氏已投水矣飛流急湍宇驟入水援之逾時石氏近岸眾救得甦而宇竟溺死龔氏欲以身殉眾止之宇父久和獲子屍貧不能葬鄉鄰助之葬勒碑記其事

魏國仕 內龍爪保人性孝友雍正六年葬父於太平山巔鑿石挑土日役工匠百餘人山穴旁有古井冬涸必遠汲大河登涉十餘里國仕於

井旁號泣拜禱泉水忽湧須臾盈井遠近觀者如堵同知田易名之曰孝感泉

魏國璉 字元商係本縣內龍保八甲人性孝友好學能詩手不釋卷隱於靈溪之太平山自號為烟霞叟邑中列成均遊膠庠者多出其門勸化鄉愚人服其德年九十三歲眼觀五代前縣孔詳報五世同堂孫廷縉等恪守家風雍雍一堂足徵盛德之報

羅長魁 生員年九十三歲係上榔保人年二十

八喪偶不復娶苦心課子 學憲張科試取進
文庠於今精神矍鑠孫曾繞膝

尹世顯 係內顆砂保民妻顧氏夫婦年皆八十
餘好善不倦四子光國列諸生孫曾繞膝一堂
雍雍鄉黨咸稱之

楊朝宰 內龍保五甲民性孝友樂施捨父楊子
勝早故母鄧氏守貞宰曲意承順族閭鄉黨咸
稱其孝於乾隆五十年修可磯車礮一座用費
五百餘金皆獨力捐修賑貸貧窮不欲人知與

人無忤惟日誦陰騭文

謝加祥 字珍安內顆砂民樂善好施於鄉鄰有
無相通緩急相恤頗有古風里黨賢之

單集文 內顆砂民年八十三歲全妻吳氏好善
樂施始終如一巳亥歲歉嘗以積餘周濟鄉鄰
教育二子仲楷仲初一列國學一列官牆迄今
孫曾繞膝僉云為善之報

劉宗文 字謨之內顆砂民胞弟宗武早故弟媳
李氏苦守二侄年幼延師課讀次侄世芳身列

官牆鄉黨見而賢之

王勝乾 字健生內顯砂民全妻李氏好善廣修
橋梁隆師重道次子儒賓身列官牆子孫繁衍
實為善之報也

袁承先 字永成內顯砂民全妻秦氏好善詩禮
傳家貧不廢書子袁龍身列官牆茲年八十三
歲猶康健不哀里稱仁壽之徵

節孝志

知縣事江右黃德基纂輯

從來天地正大之氣鍾於人則為孝子為忠臣而
閨門婦女亦皆凜然有不可磨滅之志古詩云瑤
池古冰雪為妾作心肝死者若復生剖與良人看
令人讀之起敬畏心正氣長存不容沒也我
國家教化日興風俗淳朴民間婦女皆明大義從一
而終永邑雖屬偏隅仁漸義摩人物孝義外女子
勉為節孝者亦足以徵風化之淳有已經請
者亦有僻處山陬未及上聞者爰董率鄉城紳士者

民遍為採訪皆見聞確有可據備誌之以維風云
志節孝

節孝

彭氏 向坤妻永順人生子甫晬夫亡氏年三十守節撫子紡織度日年逾七十而聰明不衰
鄒氏 李道溥妻明氏 李道溥妻王村河西人鄒氏年二十八明氏年二十七夫亡妯娌同心守節撫子成立稱雙節
熊氏 董大淮妻永順人年二十五夫亡撫子其

析娶妻生子衆多皆得成立

劉氏 史永韜妻施溶保民劉斯衛女十七歲適永韜四載而寡子世棟方彌月翁姑繼歿子女皆幼氏教訓撫字皆成立世棟補諸生有文名

李氏 彭肇模妻土官彭肇槐弟婦也雍正六年奉文隨肇模遷常德夫歿氏年二十八乾隆元年請扶柩歸事病姑甚孝遺子景煌景燦皆為諸生知府張天如旌之

雷氏 羅自清妻下榔保人生子四歲夫亡守節三十餘年教子文海為諸生

簡阿許 永順人夫亡守志撫孤雍正八年因土民哨聚氏兄有聞解至中途病死後案犯律應遷解氏父維義名亦在氏泣訴云父年逾八旬身染痰疾母七十八歲夙櫻心氣鬱疾一子幼不能扶持前行氏雖女流願以身代祈鑒氏剗心嘔血之愚准代父行氏死無憾知府袁承寵旌之曰孝義可嘉後維義亦邀免遣

梁氏 李奇顯妻功全保苗民女乾隆六年七月內隨夫樵奇顯為虎搏去氏號泣追逐揮刀傷虎足虎去奇顯得脫氏負歸醫之得不死

李氏 邑庠張正偉祖母夫早亡以義方教子孫年九十餘猶理家政孫曾繞膝男婦六十口共食雍睦無間言知府張天如旌其閭

熊氏 陳瑛妻永順人氏素多疾病勸夫娶妾嗣各舉一子未及歲夫即去世家貧勵志守節奉翁姑生養葬祭皆盡禮視妾如手足教兩子

成立守節四十四年至七十二歲而歿知府張天如旌之

石氏 李珍妻沅陵縣籍永順縣人年二十四歲生子未週夫歿家貧守節奉孀姑竭誠盡養紡績教子苦志四十八載現年七十五歲知縣陳惠疇旌之曰女中師表

張氏 楊大任妻永順縣民張梅盛女年十六適大任歷十載大任故時氏年二十六歲生二女俱幼子文德甫二歲夫亡氏誓不欲生以上

有老姑年六十一歲在原籍江西金谿縣氏葬夫後勉力迎養二十餘年備極辛懃紡績課讀子文德列諸生有文名氏守節二十四年以疾終鄉里公呈請

旌上憲題准 旌表乾隆五十年十月建坊於東關外

廖氏 王村保民賴禹伯妻年三十夫沒苦志守節教育四子家計艱難勤儉撐持撫子成立孫曾繞膝以高壽終

向氏 王村保黃廷琳妻年三十夫沒守節教
育四子脩極艱辛長子朝典緣例捐從九職三
子朝柱邑庠生餘各成立孫曾繞膝現年七十
三歲猶康健倍常

楊氏 生員陳萬選妻年五十九歲於乾隆三
十年夫故時年二十九歲撫子成立侍奉翁姑
脩極艱辛孫曾繞膝咸謂苦節所致
修氏 上榔保民劉武妻生子海僅九月夫歿
時年二十六立志堅貞勤儉紡績撫子成立現

年七十四歲

陳氏 外白砂保民周大賓妻年十八生子光
前甫三朝夫歿勵志守節奉養翁姑克盡婦道
教子有方里黨稱之

王氏 本城保楊總善妻僅生一女夫歿時年
二十四歲苦志守節立嗣為夫後堅貞自矢人
無間言

侯氏 邑庠生劉綸妻年二十二歲適綸二十
三歲生子元達甫三月夫歿並無棲止依父侯

元勤苦紡績度日年四十以疾終

唐氏 本城營兵張志剛妻陝西遊擊唐瑋之

女志剛出師金川陣亡氏年二十四歲聞夫死

悲哀欲死蓬頭垢面不為修飾幼子三歲苦撫

成立

姚氏 本城保張守成妻年十九適守成二十

三歲夫歿無子為夫立嗣矢志守節至今年六

十猶康健如常

張氏 穎砂保民李士衡妻郡庠生張成德妹

年十八適士衡生子春枝僅十日夫沒苦志守

節撫子成立延師課讀貞靜可風

蕭氏 本城保民熊登貴妻二十歲夫歿子如

麒甫二歲氏矢志守節勤儉紡績苦撫子成

立至四十九歲以病終

●陳李氏 下榔保人好善樂施年屆八旬適值王

村紳士呈請前縣丁建設義學氏慷慨命第五

子嘉選捐銀五十兩為之倡後孫大儒文彬曾

孫明光為邑諸生讀書有成足徵好善樂助之

報

羅氏 施溶保民孫承聖之妻年十八歲適承

聖僅三載夫亡撫族子士儒為夫後苦志守節

之年七十孫曾統膝一堂雍睦里開賢之

王氏 夫死家貧孝事翁姑日勤紡績課子讀

書長子陳典報典吏善繼母志次子陳常亦列

宮牆氏現年八旬餘尚屬康健鄉黨稱為孝行

所致

王氏 生員田啓科之妻完婚年餘夫故乏嗣

親鄰憐其孤苦婉勸改嫁氏願甘苦守誓不再
適現年五十八歲鄉黨稱之

曹氏 生員謝上聘之妻生子月餘夫故極貧

奉事翁姑菽水承歡沒後每逢翁姑及夫生辰

忌日虔誠齋戒泣涕終日迄今六十一歲鄰人

言及翁姑不覺淚下知者不敢復言

言及治故不覺對不味佳不唯言
 三忌其其森森森森森森森森
 奉事徐披披披披披披披披披披
 曹...
 五十八...
 其...
 其...
 其...

選舉志

古者取士之法州舉里選論秀書升始於鄉黨而
 達於邦國教之以德行文之以禮樂而後興其賢
 者能者焉漢制有孝廉茂才等科晉魏以降置九
 品以品其才行隋設進士科唐宋元明皆因之雖
 非古法皆古意也迨我

朝關門籲俊不拘資格選舉與制科並行而不悖取
 士之道於以大備永順雖新闢之區而漢土子弟
 讀書應試無殊內地今教化日興人文蔚起列兩

庠者繁盛不及備載謹將孝廉恩拔歲貢及候選等官附列於左

恩貢

塗大熙 州判乾隆四十一年分發廣東

向鼎元 謝訓 蕭建綸

李鎮山 蕭似運 丁大炳

拔貢

塗大遠 乾隆五十四年選授衡州府常寧縣教諭

宋之粹

